

յաւրկանոցսն, ամենայն մարդիկ տանին զամենայն պիտոյս նոցա. անդէն իսկ անկարաւտ յամենայն ումեքէ լցեալ էին: 15 Իսկ յետ մահուն քահանայապետին թէ առնէր ոք հանգիստ աղբատացն, մեծ պատիժս կրէր ի թագաւորէն:

16 Իսկ յաւուրսն Ներսիսի ընդ ամենայն երկիրն Հայոց կարգք պաշտաման եկեղեցոյն մեծապէս պայծառացեալ էր. եւ բազմութիւն սրբոց պաշտաւնէիցն կանոնելոցն: 17 Եւ յիշատակ սրբոց վկայից յաւուրս նորա յամենայն տեղիս Հայոց մեծախումբ ժողովովք¹ հանապազ պայծառանային, եւ պատիւ հարցն եպիսկոպոսաց յամենայն գաւառս Հայոց յաճախէր ըստ արժանի իւրեանց. եւ կարգք վանականաց եւ ի շէնս եւ յանշէնս առ հասարակ ծաղկեալ: 18 Այլ ամենայն եղծեալ ապականեցաւ խանգարեցաւ յետ մահուան նորա:

19 Իսկ յաւուրս քահանայապետութեան² Ներսիսի ամենայն գաւառք Հայոց յամենայն ի շէնս եւ ի գիւղս յամենայն կողմանս Հայոց առ հասարակ ի հրամանէ քահանայապետին էին շինեալ աւտարատունք³ հիւանդանոցք աւտարանոցք. եւ ամենայն մարդիկք երկրին Հայոց էին պտղաբերք եւ ողորմածք առ ի յիշել զաղբատս եւ զնշեալս, զտառապեալս եւ զաւտարս, զհարստահարս, զնշդեհս, զպանդուխտս, զհիւրս, զանցաւորս. եւ էր նոցա կարգեալ վերակացուս սրբոյն Ներսիսի, եւ դարմանս ի տեղեաց տեղեաց: 20 Իսկ յետ մահու նորա աւերեաց զայն ամենայն թագաւորն Պապ, եւ անարգեաց զպատիւ եկեղեցոյ. եւ բազում ինչ կարգ եւ կանոնաց ուղղութեան յաւրինուածոց՝ զոր եդ հայրապետն Ներսէս, եւ անցեալ դարծեալ ի մոռացաւնս զամենայն կարգեալն տապալէր: 21 Յետ նորա ելիցն յաշխարհէս բազում գաւառք Հայոց եւ բազում մարդիկ ի հնութիւն դիւապաշտութեան դարձան եւ ընդ բազում տեղիս Հայոց կուռս կանգնեցին ի համարձակութենէ թագաւորին Պապայ. զի ոչ գոյր յանդիմանիչ, եւ ոչ ոք էր այն՝ յորմէ խիթային. զինչ եւ կամէին գործել, համարձակութեամբ գործէին. բազումք պատկերս կանկնեալ՝ երկիր պագանէին:

22 Եւ հատ եւս յարթունիս Պապ թագաւոր զհող եկեղեցոյն, զոր տուեալ էր թագաւորին Տրդատայ առ մեծան Գրիգորիւ քահանայապետիւ ի սպաս պաշտաման եկեղեցոյն ընդ ամենայն երկիրն Հայոց: 23 Չի յեւթն հողոյն զհինգն հատանէր յարթունիս, եւ զերկուսն միայն թողոյր, երկուս հողս: 24 Եւ ըստ հողոյն թողոյր երկուս երկուս առ գելդ մի երեց եւ սարկաւազ, եւ զայն՝ սպասու կացուցանէր յիւր ի ծառայութեան զեղբարս եւ զորդիս երիցանցն

1 Յամենայն օրինակս՝ ժողովք

2 Օրինակ մի՝ հայրապետին

3 Ի միում օրինակի չիք՝ օտարատունք